



Senin, 24 Juni 2024

Ogen : Hagai 1:12-15



Mbiar Man Tuhan



Adi sekalak murid ikataken mbiar man guruna, idalankenna kai si isuruh guruna. Adi sekalak anak mbiar man orangtuana idalankenna kai si isuruh orangtuana e. Mbiar ia sabap banci saja adi la idalankenna kena ukumen. Jadi, mbiar i je erkiteken terpaksa. La obahna bangsa Israel, mbiar man Tuhan, erkiteken enggo leben Tuhan ngerana erkelangken nabi Hagai maka adi la ihamatina Tuhan alu majekken mulihi rumah pertoton si enggo runtuh ndube, adi rumahna ras keperlunna saja iukurina, maka ibahan Tuhan kesusahen si mesangat, la nusur udan, ras la turah sinuan-sinuan si erbahansa latih akap bangsa e. Erkiteken mbiar ukumen e seh man bana e maka kerina bangsa e ndalanken si isuruh Tuhan.

Amin bage gia cara rukur bangsa e, labo erbahan nembah ate Tuhan. Terjeng bage denga kin pengangkanna, e maka isuruh Tuhan nabi Hagai ngerana man bana kerina maka Tuhan tetap nemani bangsaNa. Ipekeke Tuhan tole nari ukurna kerina lako majekken rumah pertoton, ikut pe Serubabel gubernur Juda ras Josua Imam si Mbelin. Teridah tuhu maka itandai Tuhan kal bangsa e. E maka ialokenna ugapa pe perbahanenna, iarak-arakNa je nari iajariNa.

Uga kin arusna adi kataken mbiar man Tuhan? Labo erkiteken lit ukumen maka idalanken si isuruhNa, tapi lit kesadaran maka IA kap Bapanta, IA si mada ras si ngaturken kegeluhennta, IA si ncukupken kerina keperlunnta ras iaturkenna kai si cocok man banta. Adi bage me bujur si dalanken kai si isuruhNa. Mbiar man Tuhan e banci kataken malang man baNa, hormat entah pe mehamat. Erkiteken enggo sialoken si mehuli i bas IA nari, keselamatannta pe ijaminiNa i bas diri Jesus Kristus. Kesah si Badia itamakenNa i bas pusuhta si mpelimbarui gegehta tiap wari. Me bujur nge si dalanken kai si isuruhNa? Labo gelah kita la kena ukumen tapi erkiteken enggo kita iselamatkanNa.